

Illuliortiternernut aningaasalersuineq pillugu Inatsisartut inatsisaat pillugu Namminersornerullutik Oqartussat nalunaarutaat

Matumuuna nalunaarutigineqarput Illuliortiternernut aningaasalersuineq pillugu Inatsisartut inatsisaat nr. 39, 23. november 2017-meersoq, allannguutit ukunani pineqartut ilanngullugit Inatsisartut inatsisaat nr. 36, 29. november 2019-meersoq aamma Inatsisartut inatsisaat nr. 19, 30. november 2020-meersoq aamma Inatsisartut inatsisaat nr. 28, 13. Juni 2023-meersoq aamma Inatsisartut inatsisaat nr. 54, 25. november 2024-meersoq.

Kapitali 1

Atuuffia

§ 1. Inatsisartut inatsisaat una illunik sanaartornermut, iluarsaassinermit, allilerinermit pitsanngorsaaneremullu taarsigassarsinermit tapiiffigitinneremullu atorneqarpoq.

Imm. 2. Inissianut piginnittumiit imaluunniit attartortumiit taassumalu inoqutigiivinit najugassap aammalu aalajangersimasumik najugaqarfissap saniatigut siunertanut allanut tamakkiisumik ilaannakortumilluunniit atorneqartussanut eqqarsaataasunulluunniit taarsigassarsitsisoqarsinnaananilu tapiissuteqartoqarsinnaanngilaq. Taamaattoq inuussutissarsiutit annikinnerusut namminersorfusut piginnittumit imaluunniit attartortumit taassumalu inoqutigiivinit ingerlanneqartut mininneqarput.

Imm. 3. Inissianik sanaartornermut, iluarsaassinermit, allilerinermit pitsanngorsaaneremullu pisortanit tapiiffigineqartut, tapiissutit imaluunniit aningaasalersuineq pillugu inatsisinut allanut ilaasunut inissianut taarsigassarsitsisoqarsinnaanngilaq.

§ 2. Inissianik sanaartornermut, pitsanngorsaaneremut, iluarsaassinermit imaluunniit allilerinermit piffissami sanaartornermi pilersaarusionermilu inatsimmik atuuttumik naammassinnittumik sanaartornermut taamaallaat taarsigassarsitsisoqarsinnaavoq tapiiffigineqarsinnaassallutilluunniit.

§ 3. Taarsigassarsitsisinissamut tapiiffigitinneremullu neriorsuummik tunniussisoqannginnerani sanaartornissamut pituttuisumik isumaqatigiissusiorfusimanngitsunut imaluunniit sanaartornermi sulinerlut aallartinneqarsimanngitsunut taamaallaat sanaartornermut taarsigassarsitsisoqarsinnaavoq tapiiffigineqarsinnaassallutilluunniit.

Kapitali 2

Nutaanik illuliortiternernut taarsigassarsineq

§ 4. Inissiat nutaat sanaartornerinut aningaasartuutit tamarmiusut ilaannut

anigaasalersorneqarnissaannut kommunalbestyrelsi taarsigassarsisitsisinnaavoq, tak. §§ 5-8.

Imm. 2. Inissiami inissiap annertussusia 110 m² tikillugu annerpaamik taarsigassarsisitsisoqarsinnaavoq, inissiap anginerunera apeqqutaatinnagu.

Imm. 3. Sanaartornermut aningaasartuutit tamarmiusut m²-imut ataatsimut annerpaamik 20.000 kr.-inut taarsigassarsisitsisoqarsinnaavoq, aningaasartuutit annertuneruneri apeqqutaatinnagit.

§ 5. Nuummi aningaasartuutit tamarmiusut 27 %-ii tikillugit kommunalbestyrelsi nutaamik

inissialiornissamut taarsigassarsisitsisinnaavoq, taamaattorli § 4, imm. 2 naapertorlugu annerpaamik naatsorsorneqartumik tassa 594.000 kr.-inik annerpaamik taarsigassarsisitsisoqarluni, taamaattoq tak. imm. 2 aamma 3.

Imm. 2. Imm. 1 malillugu taarsigassarsisitsineq imatut annikilliertortinneqassaaq:

1) 2019-imi taarsigassarsisitsinissamut neriorsuutitut 24 %-it, tassa annerpaamik 528.000 kr.-inik taarsigassarsisitsineq

2) 2020-mi taarsigassarsisitsinissamut neriorsuutitut 21 %-it, tassa annerpaamik 462.000 kr.-inik taarsigassarsisitsineq

3) 2021-mi taarsigassarsisitsinissamut neriorsuutitut 18 %-it, tassa annerpaamik 396.000 kr.-inik taarsigassarsisitsineq

4) 2022-mi taarsigassarsisitsinissamut neriorsuutitut 15 %-it, tassa annerpaamik 330.000 kr.-inik taarsigassarsisitsineq

5) 2023-mi taarsigassarsisitsinissamut neriorsuutitut 12 %-it, tassa annerpaamik 264.000 kr.-inik taarsigassarsisitsineq

6) 2024-mi taarsigassarsisitsinissamut neriorsuutitut 9 %-it, tassa annerpaamik 198.000 kr.-inik taarsigassarsisitsineq

7) 2025-mi taarsigassarsisitsinissamut neriorsuutitut 6 %-it, tassa annerpaamik 132.000 kr.-inik taarsigassarsisitsineq

8) 2026-mi taarsigassarsisitsinissamut neriorsuutitut 3 %-it, tassa annerpaamik 66.000 kr.-inik taarsigassarsisitsineq

Imm. 3. 2027-mi januaarip aallaqqaataanit sunniuteqalersumik Nuummi taarsigassarsisitsinissamut neriorsuinerimik nalunaaruteqartoqarsinnaangilaq.

§ 6. Qaqortumi, Sisimiuni aamma Ilulissani kommunalbestyrelsi aningaasartuutit tamarmiusut 30 %-ii

tikillugit nutaamik inissialiornissamut taarsigassarsisitsisinnaavoq, taamaattorli § 4, imm. 2 naapertorlugu annerpaamik naatsorsorneqartut, tassa 660.000 kr.-inik annerpaamik taarsigassarsisitsisoqarluni.

§ 7. Maniitsumi, Aasianni aamma Tasiilami kommunalbestyrelsi aningaasartuutit tamarmiusut 35 %-ii

tikillugit taarsigassarsisitsisinnaavoq, taamaattorli § 4, imm. 2 naapertorlugu annerpaamik naatsorsorneqartut, tassa 770.000 kr.-inik annerpaamik taarsigassarsisitsisoqarluni.

§ 8. Illoqarfinni nunaqarfinnilu §§ 6 aamma 7-imi taaneqanngitsuni kommunalbestyrelsi aningaasartuutit tamarmiusut 40 %-ii tikillugit taarsigassarsisitsisinnaavoq, taamaattorli § 4, imm. 2 naapertorlugu

annerpaamik naatsorsorneqartut, tassa 880.000 kr.-inik annerpaamik taarsigassarsitsisoqarluni.

§ 9. §§ 5-8 malillugit taarsigassarsiaritit inunnut ataasiakkaanut aammalu sanaartornermut aningaasartuutit tamarmiusut sinnerinut aningaasalersuinissap uppersarneqarnerani, taamaallaat taarsigassarsiaritinneqarsinnaapput.

§ 9 a. Inuit ataasiakkaat kisimik inissiamut ataatsimut taarsigassarsitinneqarsinnaapput.

Imm. 2 Inunnut ataasiakkaanut inissialiortiternernut aningaasalersuineq pillugu Inatsisartut inatsisaat imaluunniit inissialiortiternernut aningaasalersuineq pillugu siusinnerusukkut inatsisit naapertorlugit nutaanik inissialiornissamut taarsigassarsitinneqareersimasunut, taarsigassarsititsisoqarsinnaanngilaq.

§ 9 b. Sanatitsisoq namminersortoq inunnut ataasiakkaanut tuniniaanissaq siunertaralugu nutaanik inissialiornissaavoq. Kommunalbestyrelsi § 9 malillugu nutaanik inissialiornissamut taarsigassarsititsinissamut neriorsuuteqarsinnaavoq. Nutaanik inissialiornissamut taarsigassarsititsisarneq pillugu aalajangersakkat taamaaqataanik atuutissapput.

Imm. 2. Sanatitsisup namminersortup atuilernissamut akuersisummik tunniussereernerup kingorna qaammatinit 12-init kingusinnerusumi nutaanik inissialianik tunisinerani, inissianut tunineqarsimanngitsunut taarsigassarsititsinissamut neriorsuut ilimasaarinertaqanngitsumik atorunnaassaaq.

§ 10. §§ 5-8 naapertorlugit taarsigassarsitsinerit inissiami qularnaveeqqusiussinikkut qulakkeerneqassapput. Sanaartornermi aningaasartuutit tamarmiusut sinnerisa sillimmasiinnermullu akiliussinerit aningaasalersornissaannut inissiami qularnaveeqqusiilluni taarsigassarsineq taarsigassarsitsinerit ataqqissavaat.

Imm. 2. Taarsigassarsiat atulernissaanut akuersisummumut ulluliussamiit ukiuni 20-ni ernialersorneqarnatillu akilersugassaanngillat, tamatumalu kingorna Nationalbankip erniaritittagai procentinik pingasunik ilallugit erniaqartinneqarlutik amerlaqatigiinnik annertussusilerlugit ukiuni 15-ini akilersugassanngussallutik. Taarsigassarsinermi allagartap qanoq iluseqarnissaa suullu piumasqaataassanersut kommunalbestyrelsimit aalajangersarneqassapput.

Imm. 3. Taarsigassarsiat akilersornissaannut akiligassallu akilersornissaannut maleruagassanik Naalakkersuisut aalajangersaasinnaapput.

§ 11. § 10, imm. 1-imi illunut pineqartunut atatillugu piginnittut nikinneri tamaasa pillugit kommunalbestyrelsi ilisimatinneqartassaaq. Inissialiortiternernut aningaasalersuineq pillugu Inatsisartut inatsisaat imaluunniit inissialiortiternernut aningaasalersuineq pillugu siusinnerusukkut inatsisit naapertorlugit nutaanik inissialiornissamut taarsigassarsiaqariinngitsunut piginnittut nikinnerat eqqaassanngikkaanni, §§ 5-8 malillugit taarsigassarsiat piginnittut nikinneranni akiligassanngortinneqassapput. Ingerlatseqatigiiffinni, peqatigiiffinni assigisaannilu pigisanik aalaakkaasunik piginnittuunissamik, attartortitsinissamik imaluunniit allatut ingerlatsinissamik pingaarnertut siunertaqartuni pigisanik, piginneqataassutinik, aktiaatinik assigisaannillu tunniussineq aammattaaq piginnittut nikinnerattut isigineqarpoq.

Imm. 2. Piginnittut nikinnerini tamani kommunalbestyrelsip taarsigassarsitsinerani taarsigassarsiat atsiorneqarnerisa angissusiata 15 %-iatut annertutigisumik piginnittut nikinnerannut akiliutissaq akilernerqartassaaq. Kommunalbestyrelsip taarsigassarsitsineranik tigusinnermut piumasarineqarpoq piginnittut nikinneranni akiliutip akilernerqarnissaa.

Imm. 3. Atulernissaanut akuersissutip tunniunneqarnerata kingorna qaammatinik arfinilinnik kingusinnerusumik pisunut inissianik nutaatut sanaartorneqartunik tunisinermi taarsigassarsitinneqarnissamut neriorsuummik tunniussineq piginnittut nikinnerattut isigineqarpoq piginnittut nikinneranni akiliummik akiliisussaaffiusoq.

Imm. 4. Piginnittut nikinnerini, pisumit tiguneqartut taarsigassarsiat katinneri aamma niuernermi aningaasartuutit missiliussat tapiliunneri ilanngaatilugit pisinermi akip 90 %-iinik annerpaamik aningaasartaqartut taarsigassarsiat kommunalbestyrelsip taarsigassarsiarititaasa ataqqissavai.

§ 11 a. Inissiaq qularnaveeqqusiullugu taarsigassarsiat allanngortinneqarneranni aammalu piginnittut nikisinneqaratik tamanna pisimappat kommunalbestyrelsi taarsigassarsiaaersunut inissiap niuerfinni nalingata pisortani taarsigassarsiarineqartut inissiami qularnaveeqqusiinikkut qularnaarneqartut 90 %-iannik annerpaamik ilanngaaffiginerinut ataqqinninnermut tulleriiarinnermullu uppernarsaasinnaavoq. Taamaattoq inissianut ukiut 20-t sinnerlugit pisoqaassusilinnut tunngatillugu taarsigassarsiaaersut inissiap niuerfinni nalingata 80 %-iannut annertussulernerqarsinnaapput, matumani inissiami qularnaveeqqusiinikkut pisortani taarsigassarsiarineqartut inerneranni ilanngaateqarnikkut.

Imm. 2. Kommunalbestyrelsip ataqqinninnissamut tulleriiarinnermullu uppernarsaanissaani inissiami akiligassanngortunut allanut kingusinnerusukkullu akiligassanngortunut assinganik nukingisaarinissamut uppernarsaasoqarnissaanik piumasaqarfiupput.

Imm. 3. Inissiap pisoqaassusaa illuummut atuinnissamut akuersissutaagallartumut ulluliunneqartoq atorlugu naatsorsorneqassaaq.

Imm. 4. Inissiap massakkut niuerfinni nalinga illuutitut nalilersuinerit marluk agguaqatigiissitsinnermut tunngasut illuutitut sullissisartunit ilisimasalinnit suliarineqartut atorlugit naatsorsuiffigineqassaaq, taakkualu illuutit aalaakkaasut najugaqarfissatut pisiarisarnerannut tuniniartarnerannullu suliaqassapput. Illuutitut nalilersuinerit piumasaqaatit pisarneq malillugu atorneqartut malillugit aamma nangaassuteqarnani, piumasaqaateqarnani imaluunniit inniminniinani aammalu piffissap qaammatit 3-6 iluani tunineqarsinnaanissaat naatsorsuutigalugu aningaasat atorlugit tunisinertut suliarineqassapput. Illuutitut nalilersuinerit ataqqinninnissamut tulleriiarinnissamut uppernarsaanissamut qinnuteqaatit sioqqullugit kingusinnerpaamik ullut qaammatisiuteqarfiusut 30-t qaangiutsinnagit suliarineqareersimassapput.

§ 12. Kommunalbestyrelsip §§ 5-8 naapertorlugit taarsigassarsiarititai akiligassaatinneqassapput:

- 1) Erniat taarsigassarsialluunniit akilersuutit akilernerqanngippata, aamma illumi qularnaveeqqusiussaqarluni taarsigassarsinnermi allagartaq naapertorlugu erniat akilersuutillu akilernissaat pillugu maleruagassat malillugit piffissaliussap naanissaa sioqqullugu akiligassanik akilinngisanik taarsigassarsisoq akiliisimanngippat, tak. qularnaveeqqut pillugu Kalaallit Nunaannut inatsit.
- 2) Taarsigassarsisoq inissiamik illersorneqarsinnaasumik aserfallatsaaliisimanngippat, paasineqarpallu kommunalbestyrelsip qularnaveeqqusiisutikkut qulakkeeriffigisaa taamaalilluni ajornerulersoq.

- 3) Taarsigassarsisup inissiaq ikualattoornissamut illullu ajoqusersinnaaneranut sillimmasersimangippagu.
- 4) Inissianik attartorneq pillugu inatsisartut peqqussutaanni attartortitsineq pillugu aalajangersakkanut akerliusunik inissiamik taarsigassarsisoq attartortitsippat.
- 5) Inissiaq taarsigassarsisumut imaluunniit attartortumut taassumalu inoqutigiivinit najugaqarfissatut aammalu aalajangersimasumik najugassatut atornagu siunertanut allanut tamakkiisumik ilaannakortumilluunniit atorneqassaaq. Taamaattoq inuussutissarsiutit mikinerusut namminersortut taarsigassarsisumit imaluunniit attartortumut taassumalu inoqutigiivinit ingerlanneqartut mininneqarput.
- 6) Taarsigassarsisoq piginnittut nikinneri pillugu taarsigassarsisitsisumut nalunaaruteqanngitsoorpat aamma pisunik utoqqatsissutaasinnaasunik peqanngippat.
- 7) Piginnittut nikinnerini piginnittut nikinnerini akiliummik taarsigassarsisoq akiliinngitsoorpat.
- Imm. 2. Imm. 1, nr. 4 taamaaqataanik atorneqassaaq inissiaq inatsisitigut pisinnaatitaasumut pisussaataasumullu attartortinneqarpat.*

Kapitali 3

Illunik pioreersunik iluarsaassinerit, pitsanngorsaanerit allilerinerillu

§ 13. Kommunalbestyrelsiinissiat pioreersut iluarsaannerinut, pitsanngorsarnerinut allilerneqarnerinullu tassani aningaasartuutit tamarmiusut 40 %-ii tikillugit taarsigassarsisitsisinnaavoq taamaattorli annerpaamik 300.000 kr.-inik.

Imm. 2. Inissiamut ataatsimut iluarsaassinernut, pitsanngorsaanerit imaluunniit allilerinerit ataasiaannarluni taarsigassarsisitsisoqarsinnaavoq.

Imm. 3. Allilerinerup kingorna 110 m²-imik annertunerusumik angissuseqartunut inissianut allilerinerit taarsigassarsisitsisoqarsinnaangilaq.

§ 14. § 13 naapertorlugu taarsigassarsisitsinerit piumasarineqarpoq:

- 1) Inissiaq inissiamik piginnittumut, taassuma aappaanut imaluunniit meeqqanut inersimangitsunut inissiatut atorneqassasoq.
- 2) Inissiaq piffissami qinnuteqarfusumi ukiunik 20-inik pisoqaanerussasoq.
- 3) Inissiaq ikualattoornissamut illullu ajoqusersinnaaneranut sillimmaserneqarsimassaaq aamma sillimmasiinermit akiliutissatigut kinguaattoortoqarsimanani.

Imm. 2. Iluarsaassinermut, pitsanngorsaanerit allilerinerimullu aningaasartuutit tamarmiusut sinnerinut taarsigassarsisoq nammineq aningaasalersuissappat taamaallaat taarsigassarsisitsisoqarsinnaavoq.

Imm. 3. Aappaasumut sanilliunneqarpoq nalunaarsorsimalluni aapparisaq, imaluunniit ukiuni 2-ini kingullerni inooqatigiissimappata, katissimanermut assingusumik inooqatigiinneq.

§ 15. Inuulluarniutit taaneqarsinnaasunut iluarsaassinernut imaluunniit pitsanngorsaanerit taarsigassarsisitsisoqarsinnaangilaq.

§ 16. Inissiami qularnaveeqqusiussinikkut qulakkeerneqartumik taarsigassarsiatut ernialersorneqanngitsutut akilersugassaanngitsutullu taarsigassarsisitsisoqassaaq. Inissiami qularnaveeqqusiussinikkut taarsigassarsiaasinnaasut allat taarsigassarsinerup ataqqissavai.

§ 17. Kommunalbestyrelsip taarsigassarsisitsinera, tak. § 13 piginnittut nikinnerini akiligassanngortinneqassaaq, aappariit akornanni piginnittut nikinneri eqqaassanngikkaanni aamma averusernermut imaluunniit avinnermut atatillugu piginnittut nikinneri imaluunniit kommunalbestyrelse allamik aalajangiisimanngippat.

§ 18. Kommunalbestyrelsip taarsigassarsisitsinera tak. § 13 aamma akiligassanngortinneqassaaq:

- 1) Taarsigassarsisoq inissiamik illersorneqarsinnaasumik aserfallatsaaliisimanngippat, kommunalbestyrelsillu paasippagu kommunalbestyrelsip qularnaveeqqusiissutikkut qulakkeeriffigisaa taamaalilluni ajornerulersoq.
- 2) Taarsigassarsisup inissiaq ikuallattoornissamut illullu ajoqusersinnaaneranut sillimmasersimanngippagu.
- 3) Inissianik attartorneq pillugu inatsisartut peqqussutaanni attartortitsineq pillugu aalajangersakkanut akerliusunik inissiamik taarsigassarsisoq attartortitsippat.
- 4) Inissiaq taarsigassarsisumit imaluunniit attartortumit taassumalu inoqutigiivinit najugaqarfiginagu aalajangersimasumillu najugaqarfiginagu siunertanut allanut tamakkiisumik ilaannakortumilluunniit atorineqarsimappat. Inuussutissarsiutit mikinerusut namminersortut taarsigassarsisumit imaluunniit attartortumit taassumalu inoqutigiivinit ingerlanneqartut taamaattoq mininneqarput.”Inissiami ininik inuussutissarsiornermut aaqqissuussisoqarsimappat imaluunniit inissiamiit inuussutissarsiummik ingerlatsisoqarpat. Inuussutissarsiutilli annikitsut namminersorfiusullu ilaangillat.
- 5) Inissiaq taarsigassarsisitsisumut initut atorneqanngippat.
Imm. 2. Imm. 1, nr. 3 taamaaqataanik atorneqassaaq inissiaq inatsisitigut pisinnaatitaasumut pisussaataasumullu attartortinneqarpat.

Kapitali 4

Illunik pioreersunik soraanermusialinnut pigineqartunik iluarsaassinerit

§ 19. Soraarnerussutisialimmit inissiatut atorneqartumut aamma soraarnerussutisiaqartoq taassumalu aapparisaq marluullutik inissiamik kisimiillutik pigineqartumut inissiamik pioreersumik iluarsartuussinermut kommunalbestyrelsi 300.000 koruunit tikillugit taarsigassarsisitsisinnaavoq.

Imm. 2. Soraarnerussutisialimmit inissiatut atorneqartumi aamma soraarnerussutisiaqartup taassumalu aapparisaata marluullutik inissiami kisimiillutik pigisaanni inissiap iluata silaannaata radoneqassusianik annikillisaaniarnermut Kommunimi siulittaasut kr. 100.000 tikillugit taarsigassarsisitsisinnaapput.

Imm. 3. Soraarnerussutisiaqartutut isigineqarput inuit utoqqalinersiuteqarsinnaatitaasut, siusinaartumik soraarnerussutisiaqarsinnaatitaasut imaluunniit tjenestemanditut soraarnerussutisiaqartut.

Imm. 4. Aappaasumut sanilliunneqarpoq nalunaarsorsimalluni aapparisaq, imaluunniit ukiuni marlunni kingullerni inooqatigiissimappata, katissimanermut assingusumik inooqatigiinneq.

Imm. 5. Ataatsikkut kapitali 3-mi aalajangersakkat naapertorlugit taarsigassarsititsisoqarlunilu imaluunniit kapitali 4 a-mi aalajangersakkat naapertorlugit tapiissuteqartoqarlunilu, kapitali manna naapertorlugu taarsigassarsititsisoqarsinnaanngilaq.

§ 20. Inissiap atorineqarnerata imaluunniit atugaanerata allanngortinnissaanik siunertaqartunut imaluunniit kinguneqartunut imaluunniit inuulluarniutitut taaneqarsinnaasunut iluarsaassinernut pitsanngorsaanernullu taarsigassarsitsisoqarsinnaangilaq.

§ 21. § 19-imi, imm. 1 aamma 2 naapertorlugit taarsigassarsitsisinissami makkua piumasarineqarput:

1) Iluarsartuussinerup imaluunniit inissiap iluata silaannaata radoneqassusianik annikillisaaniarnerup aningaasalersornissaanut aningaaserivimmi imaluunniit illuummik qularnaveeqqusiilluni taarsigassarsitsisarfinni nalinginnaasumik piumasaqaatit malillugit taarsigassarsinissamut itigartitaasimaneq.

2) Inissiaq ikualattoornissamut aamma illup ajoqusersinnaaneranut sillimaserneqarsimanissaa aamma sillimasiinermi akiliutissani kinguaattoortoqarsimannginnissaa.

3) Katissimallugu aappaasup inissiamik piginneqataasutut iluarsartuussinerup imaluunniit inissiap iluata silaannaata radoneqassusianik annikillisaaniarnermut kiisalu taarsigassarsinissamut akuersisimanissaa.

Imm. 2 Inissiap iluata silaannaata radoneqassusissaanik Kalaallit Nunaanni Illuliornermut malittarisassani qaqugukkulluunniit atuuttuulluni killiliunneqartumik qaangiisimanissaa, § 19-imi imm. 2 naapertorlugi taarsigassarsitsisinissami aamma piumasaqaataavoq.

Imm. 3. Iluarsartuussinerup imaluunniit inissiap silaannaata radoneqassusianik annikillisaanissami tamakkiisumik aningaasartuutissat sinneri taarsigassarsitinneqartup nammineerluni aningaasalersussappagit taamaallaat taarsigassarsitsisoqarsinnaavoq.

§ 22. Kapitali manna malillugu inissiami tamarmiusumi qularnaveeqqusiussinikkut qulakkeerneqartumik taarsigassarsiatut ernialersorneqanngitsutut akilersugassaanngitsutullu taarsigassarsitsisoqassaaq. Inissiami qularnaveeqqusiussinikkut taarsigassarsiaasinnaasut allat taarsigassarsinerup ataqqissavai.

§ 23. Kommunalbestyrelsi taarsigassarsitsinera piginnittut nikinnerini akiligassanngortinneqassaaq, taarsigassarsisup taassumalu aappaata akornanni piginnittut nikinneri eqqaassanngikkaanni imaluunniit kommunalbestyrelse allamik aalajangiisimanngippat.

§ 24. Kommunalbestyrelsi taarsigassarsitsinera tak. § 19 aamma akiligassanngortinneqassaaq:

1) Taarsigassarsisup inissiaq ikualattoornissamut illullu ajoqusersinnaaneranut sillimasersimanngippagu.

2) Inissiaq attartortinneqarpat.

3) Inissiaq soraarnermusiaqartumut initut atorineqanngippat.

4) Inissiaq taarsigassarsisup imaluunniit attartortup taassumalu inoqutigiivinit najugassatut aalajangersimasumillu najugaqarfissatut atornagu siunertanut allanut tamakkiisumik ilaannakortumilluunniit atorineqassaaq. Inuussutissarsiutit mikinerusut namminersortut inissiamik piginnittumit imaluunniit attartortumit taassumalu inoqutigiivinit ingerlanneqartut taamaattoq mininneqarput.

Kapitali 4 a

Iluarsaassinernut, pitsanngorsaanernut alliliinernulluunniit tapiissutit

§ 24 a. Inissianut, inunnit ukiuni akileraarfiusuni kingullerni marlunni inunnit ukiumut 300.000 koruunit inorlugit isertitaqarsimasunit pigineqartunut, imaluunniit inunnit, ulloq manna tikillugu isertitarisimasaat apeqqutaatinngit siunissami qanittumi inoqutigiinni ukiumut 300.000 koruunit inorlugit isertitaqartussatut naatsorsuutigineqartunit pigineqartunut annerpaamik 150.000 koruuninik inissiamik iluarsaassinermut, pitsanngorsaannermut imaluunniit alliliinermut kommunalbestyrelsi tapiissuteqarsinnaavoq.

Imm. 2. Taamaallaat inissiamut Namminersorlutik Oqartussanit taarsigassarsisoqarsimappat, imaluunniit maanna piginnittuusut taarsigassarsisuullutik Namminersorlutik Oqartussanit taarsigassarsisoqarsimappat kommunalbestyrelsi tapiissuteqarsinnaavoq.

Imm. 3. Meeqqanut suli angerlarsimaffimmi najugaqartunut, 18-it inorlugit ukioqartunut, najukkami inuit nalunaarsorsimaffianni nalunaarsorsimasunut, taamaattorli amerlanerpaamik meeqqanut arfinilinnut, isertitassanut killigitat meeqqamut ataatsimut 4.000 koruuninik qaffanneqartassapput.

§ 24 b. Piffissaq qinnuteqarfusoq sioqqullugu qaammatit 60-it kingulliit ingerlanerini pisortat inissiamik iluarsaassinissamut, pitsanngorsaannissamut alliliinissamulluunniit tapiissuteqarsimappata, kommunalbestyrelsi tapiissuteqarsinnaanngilaq.

Imm. 2. Inissianut sumiiffinni, nalinginnaasumik inissiaq qularnaveeqqusiullugu aningaaserivimmit imaluunniit realkreditimit taarsigassarsiviusinnaasuni inissisimasunut kommunalbestyrelsi tapiissuteqarsinnaanngilaq.

Imm. 3. Kommunalbestyrelsip § 24 a naapertorlugu qinnuteqaammik naliliinermini uku eqqarsaatigissavai:

- 1) iluarsaassinissap kissaatigisap annertussusissaa,
- 2) alliliinerup pitsanngorsaanerulluunniit qinnuteqartup pigisaanut nalilinnut aammalu nammineerluni suliaqarnissamut piginnaaneqarneranut sanilliunneqarnissaa, kiisalu
- 3) inissiap pisoqaassusia niuerutigineqarnermilu nalinga.

Imm. 4. Naalakkersuisut inissiamik iluarsaassinermut, pitsanngorsaannermut alliliinermulluunniit maleruagassiorsinnaapput, taakkunungalu aqutsineq, aningasat tunniunneqarnerat suliaassallu tapiiffigineqarsinnaatitaasut ilaatinneqarput.

§ 24 c. Inunnit ukiuni kingullerni marlunni akileraarusigassanik ukiumut kr. 300.000 inorlugit inoqutigiittut isertitaqarsimasunit imaluunniit inoqutigiit ulloq manna tikillugu isertitarisimasaat apeqqutaatinngit siunissami qanittumi akileraarusigassanik ukiumut kr. 300.000 inorlugit isertitaqartussatut naatsorsuutigineqartunit inissiani pigineqartuni atorneqartunilu, inissiat iluisa silaannaasa radoneqassutsinik annikillisaaniarnernut kommunimi siulittaasut kr. 100.000 tikillugit tapiissuteqarsinnaapput. § 24 a-mi, imm. 3 assinganik atuuppoq.

Imm. 2. Tapiissuteqarnissami piumasarineqarpoq:

- 1) inissiap iluata silaannaata radoneqassusissaanik Kalaallit Nunaanni Illuliornermut malittarisassani qaqugukkulluunniit killiliunneqartumik, inissiap iluata silaannaata radoneqassusissaanik qaangiisimanissaa,
- 2) inissiap iluata silaannaata radoneqassusaanik annikillisaanissap aningaasalersornissaanut aningaaserivimmi imaluunniit illuummik qularnaveeqqusiilluni taarsigassarsisitsisarfimmi nalinginnaasumik piumasaqaatit malillugit taarsigassarsinissamut itigartitaasimaneq aamma

3) inissiaq ikualattoornissamut illullu ajoqusersinnaaneranut sillimaserneqarsimassaaq aamma sillimasiinermi akiliutissanik akilinngitsuugaqarani.

Imm. 3. Inissiap silaannaata radoneqassusianik annikillisaanissami tamakkiisumik aningaasartuutissat sinnerinik qinnuteqartoq nammineq aningaasalersuissappat taamaallaat tapiissuteqartoqarsinnaavoq.

Imm. 4. Inissiap silaannaata radoneqassusianik annikillisaanissami tapiissuteqarnissamut Naalakkersuisut maleruagassiorsinnaapput, taakkunungalugu aqutsineq, aningaasat tunniunneqarnerat suliassallu tapiiffigineqarsinnaatitaasut ilaatinneqarput.

Kapitali 5

Ataatsimut aalajangersakkat

Taarsigassarsinissamut qinnuteqaatinik aqutsineq il.il.

§ 25. Inatsisartut inatsisaat manna naapertorlugu suliamik suliarinninnermi aningaasartuutitut matussutissatut kommunalbestyrelsip taarsigassarsiarititat 0,5 procentiinik annertussuseqartumik akileeqqusisoqassaaq.

Imm. 2. Piffissami taarsigassarsisup taarsigassarsiat tunniuteqqullugit kommunalbestyrelsimut qinnuteqarfigisaani taarsigassarsisup akitsuut kommunalbestyrelsimut akilissavaa. Taamaattoq taarsigassarsianik tunniussinnermi akiliutissaq ilanngaatineqassasoq, kommunalbestyrelsi aalajangersinnaavoq.

§ 26. Kommunalborgstyrelsiqularnaveeqqusiinnermut allagartap atsiorneqarneranut atatillugu suliamik suliarinninnermut akitsuummik 1.250 kr.-inik akileeqqusisinnaavoq.

Imm. 2. Kommunalborgstyrelsi aningaaserivimmut ataatsimut amerlanerusulluunniit qularnaveeqqusiinnermi allagartap atsiorneqarnissaanut kiisalu akitsuummik akileeqqusisinnamut piginnaatitsissummik tunniussisinnaavoq.

§ 27. Inissianik nutaanik sanaartornissamut qinnuteqaatit allakkatigut kommunalborgstyrelsimut nassiunneqassapput.

Imm. 2. Qinnuteqaammut ilanngunneqassapput:

1) Pilersaarummut nassuiaat inissiat amerlassusaannut inissiamullu ataatsimut inissiap annertussusaa pillugu paasissutissanik imaqartoq.

2) Sanaartornermi aningaasartuutitut tamakkiisunut missingersuutit.

3) Kommunalborgstyrelsimiit nunaminertamik immikkoortitsineq imaluunniit nunaminertamik tunineqarnek.

4) Nammineerluni aningaasalersuutissat pissarsiarisimaneritut uppersarsaat, tak. § 9.

5) Qinnuteqartoq Inatsisartut inatsisaanni matumani imaluunniit inatsisini allani taarsigassarsiaqariinngitsoq uppersarsaat, takuuk § 1, imm. 3.

6) Qinnuteqartup inuup normua, CVR-normua, najugaqarnermut uppersarsaataa imaluunniit uppersarsaat alla kinaassutsimik erseqqisumik takutitsisoq.”

7) Qinnuteqartup pisortanut akiitsoqarnera pillugu Akiliitsiniarnermut oqartussaniit nalunaarut.

Imm. 3. Qinnuteqaatit nassiunneqartut tunngavigalugit qinnutigineqartut aningaasaliissutigineqarsinnaanersut kommunalbestyrelsi isummissaaq.

§ 28. Kapitali 3 aamma 4 naapertorlugit taarsigassarsitinneqarnissamik qinnuteqaat kiisalu kapitali 4 a naapertorlugu tapiiffigineqarnissamik qinnuteqaat allaganngorlugu kommunimi siulittaasunut nassiunneqassaaq.

Imm. 2. Qinnuteqaammut ilanngunneqassapput:

- 1) Iluarsartuussinissamut, pitsanngorsaanissamut alliliinissamulluunniit kissaatigineqartumut nassuiaat.
- 2) Inissiaq pillugu nassuiaat, tassunga ilanngullugit pisoqaassusaa, angissusaa qanorlu pitsaassuseqarnera.
- 3) Suliassami aningaasartuutitut tamarmiusunut missingersuusaaq.
- 4) Sulineq pineqartoq nunaminertamik atugassinneqarnissamik pisariaqartitsippat kommunimi siulittaasunit nunaminertamik immikkoortitsineq imaluunniit nunaminertamik atugassinneqarnek.
- 5) Nammineq aningaasalersuisinnaanermut uppersarsaat.
- 6) Qinnuteqartup inuup-normua aamma najugaqarnermut allagartaaq.
- 7) Inissiamut piginnittuuneeq pillugu uppersarsaat.
- 8) Qinnuteqartup pisortanut akiitsoqarnera pillugu Akiliisitsiniarnermut oqartussaniit nalunaarut.

Imm. 3. § 19-imi imm. 2 naapertorlugu taarsigassarsitinneqarnissamik imaluunniit § 24 c naapertorlugu tapiiffigineqarnissamik qinnuteqaammut aamma ilanngunneqassapput:

- 1) Uuttuutit matoqqasut qassiunerinik, sumullu inissinneqarsimanerinin kiisalu piffissaq uuttortaaffusooq pillugit paasissutissaaq.
- 2) Misissueqqissaartarfimmit nalunaarusiaq.
- 3) Inissiap iluata silaannaata radoneqassusiata annikillisinneqarnissaanut sanaartukkanik immikkut ilisimasallip siunnersuuteqarluni allakkiaa.

Imm. 4. Qinnuteqaatit nassiunneqartut tunngavigalugit taarsigassarsitsisoqarsinnaanersoq imaluunniit tapiissuteqartoqarsinnaanersoq kommunimi siulittaasut isummissapput.”

§ 29. 25.000 kr.-it sinnerlugit pisortanut akiitsunik akilerneqartussanik akiliisimanngitsumut qinnuteqartumut taarsigassarsitsinissamut kommunalbestyrelsi neriorsuuteqarsinnaanngilaq.

§ 30. Taarsigassarsitinneqarnissamik imaluunniit tapiiffigineqarnissamik qinnuteqaat kommunimi siulittaasunit akuerineqarpat neriorsuut tunniunneqassaaq, tassanilu taarsigassarsiaritinneqartut imaluunniit tapiissutigineqartut annertussuserigallagassaat aammalu piumasaqaatit allassimassallutik.

Imm. 2. Kommunimi siulittaasut taarsigassarsitsineranni imaluunniit tapiissuteqarneranni aningaasaliissutaasunut tunngavigineqartuni aningaasartuutitut missingersuutini allanngortoqarpat, allannguinerlu taarsigassarsiat imaluunniit tapiissutit inaarutaasumik annertussusiinut sunniuteqarpat, qinnuteqartoq pisariaqanngitsumik kinguarsaanani tamanna kommunimi siulittaasunut nalunaarutigissavaa. Taamaattoqanngippat inaarutaasumik taarsigassarsiat imaluunniit tapiissutit neriorsuutigineqartunit annertunerulersinneqarsinnaanngillat.

§ 31. Taarsigassarsiat imaluunniit tapiissutit inaarutaasumik annertussusaat sanaartornermi inaarutaasumik naatsorsuutit tunngavigalugit naatsorsorneqassapput. Sanaartornermi inaarutaasumik naatsorsuutit suliamut attuumassuteqanngitsumit uppersarsarneqassapput.

Imm. 2. Qinnuteqartup nammineq sulinerata nalinga aningaasartuutitut tamarmiusunut ilaassanngilaq, tak. imm. 1. Tamannali sanaartornerup iluani qinnuteqartoq ileqquusumik suliffeqarneranut atasumik qinnuteqartoq suliaraqpat atuutissanngilaq.

§ 32. Inissiap sanaartorneqarnera, iluarsaanneqarnera, pitsanngorsarneqarnera allilernerqarneralu neriorsuutitut allakkiap tunniunneqarneraniit ukiut marluk iluanni aallartinneqareersimassaaq kiisalu ukiut pingasut iluanni naammassineqarsimallunilu atorneqalereersimassalluni. Taamaattoqanngippat neriorsuut siumoortumik nalunaarutigineqarani atorunnaarsinneqassaaq.

Imm. 2. Taarsigassarsisoq neriorsuutitut allakkiap tunniunneqarneraniit ukiut marluk iluanni suliniut aallartinneqarsimanersoq imaluunniit aallartinneqarsimannginnersoq pillugu kommunalbestyrelsimut paasissutissanik nassiussissaaq.

Imm. 3. Taarsigassarsisoq neriorsuutitut allakkiap tunniunneqarneraniit ukiut pingasut iluanni atuilernermut akuersissutip assilineranik kommunalbestyrelsimut nassiussissaaq.

Imm. 4. Kommunalbestyrelsi immikkut pisuni piffissami killissarititaasut imm. 1-imi allassimasuniit immikkut akuersissuteqarsinnaavoq.

Taarsigassarsianik tapiissutinillu tunniussineq

§ 33. Sanaartorneq, iluarsaassineq, pitsanngorsaaneq imaluunniit allilinerineq naammassineqarpat aamma sanaartornermi naatsorsuutit uppersarneqarsimasut aamma qularnaveeqqusiussaqluni taarsigassarsinermi allagartap uparuagassartaqanngitsup naqeqqaarneranik nalunaarsorneqarsimasup naqissuserneqarsimasullu kiisalu ikuallattoornissamut illullu ajoqusernissaanut sillimmasiisimanermut uppersaatipt takutinneqarnerisigut taarsigassarsiat tunniunneqassapput. Taamaattorli aningaasaliissutit kommunalbestyrelsip missingersuusiutut akuerisaanni ukiumi ilanngunneqarfianni ukiumi siusinnerpaamik taarsigassarsiat tunniunneqarsinnaallutik.

Imm. 2. Sanaartukkanut naatsorsuutini aningaasartuutit tamarmiusut sananermut, iluarsaanermut, pitsanngorsaaneermut alliliinermulluunniit atasutillit ilaatinneqassapput. Sanaartukkanut naatsorsuutit kukkunersiuisartumit nalunaarsorneqartumit, kukkunersiuisumit naalagaaffimmit akuerisaasumit imaluunniit Kalaallit Nunaanni aningaaserivimmit uppersarneqarsimassapput.

§ 33 a. Kommunalbestyrelsi § 33 apeqqutaatinnagu taarsigassarsiat kapitali 3-4-mi ilaasut tamakkiisumik ilaannakortumilluunniit ingerlaavartumik tunniuttarnissaanut aalajangiisinnaavoq aamma sulisimanermut atorussanullu tunniunneqartartut sanaartortitsisartumit akiligassiissutit naleqqussarnissaannut tunngatillugu. § 34 allanngornani atuutiinnassaaq.

Imm. 2. Akiligassiissutip akilernerqarnissaa pillugu piumasaqarneq taarsigassarsisumit aamma sanaartugassanik suliassinneqartartumit uppersaammik atsiukkamik ilallugu kommunalbestyrelsimut nassiunneqassaaq, tassanilu sulinerit atorussallu akiligassiissutitallit suliarineqarsimanerannut sanaartorfimmullu tunniunneqarsimanerannut sanaartortitsisartumit uppersaaneq ilanngunneqassaaq.

Imm. 3. Taarsigassarsisoqarnissaanut neriorsuutip suliarinera ilanngullugu suliarineqareerpat taarsigassarsisoq piaartumik aamma piffissaliussaq kommunalbestyrelsimit aalajangersagaq nallertinnagu uppersaatiissanik § 33-mut ilaasunik pisariaqartinneqartunik nassiussissaaq.

Imm. 4. Imm. 3 naapertorlugu piffissaliussaq qaangerneqarsimappat taarsigassarsiat ingerlaannartumik akiligassanngortinneqassapput.

Imm. 5. Kommunalbestyrelsip immikkut pisoqarsimatillugu imm. 3 malillugu piffissaliussaq aalajangersarneqartoq sivitsuiffigisinnaavaa.

§ 34. Inatsisartut inatsisaat una naapertorlugu taarsigassarsiniartumut pisortanut akilerneqarsimanngitsunik akiitsoqartumut taarsigassarsiat tunniunneqarsinnaanngillat. Akiitsut akilerneqarsimanngitsut aaqqinnissaannut taarsigassarsiat Akiliisitsiniartarfimmut kommunalbestyrelsip tunniutissavai. Nuussineq imaluunniit eqqartuussivikkut malersuineq naapertorlugu taarsigassarsianit iluanaarutissat sinneri taarsigassarsisumut imaluunniit pisussaatinneqartumut tunniunneqassapput.

Imm. 2. Taarsigassarsiat tunniunneqarnissaat sioqqullugu kommunalbestyrelsi taarsigassarsisup pisortanut akiitsoqarnerseq pillugu Namminersorlutik Oqartussani Akiliisitsiniartarfimmit nalunaarummik pissarsiniassaaq.

§ 34 a. Inissiamik iluarsartuussineq, pitsanngorsaaneq, alliliineq imaluunniit inissiap iluata silaannaata radoneqassusianik annikillisaaneq naammassineqarpat aamma sanaartornermi naatsorsuutit uppersarnerneqarsimasut takutinneqarnerisigut kiisalu ikuallattoornissamut illullu ajoqusernissaanut sillimasiisimanermut uppersarsaatip takutinneqarnerisigut, § 24 a aamma § 24 c naapertorlugit tapiissutit tunniunneqassapput. Taamaattorli aningaasaliissutit kommunimi siulittaasut missingersuusiutut akuerisaanni ukiumi ilanngunneqarfianni siusinnerpaamik tapiissutit tunniunneqarsinnaapput. Tapiissutit entreprenørimut suliaqartumut toqqaannartumik tunniunneqarnissaannik kommunimi siulittaasut aalajangiisinnaapput.

Imm. 2. Alliliineri tapiissutit tunniunneqarnissaanni atuilernissamut akuersissuteqarnissaq aamma piumasaqaataavoq.

Illup angissusia aamma kvadratmeterimut akit

§ 35. Inissiap annertussusaa inissiami init tamarmik annertussusaattut naatsorsorneqassaaq, tak. imm. 2. Pequusiviit, quit, biilnut oqqussiviit, aneerasaartarfiit imaluunniit biilit unittarfii, illup silammut iigaasa avataaniittut imaluunniit inissiamit immikkoortillugit inissiat naatsorsuineri ilanngunneqassanngillat, taakku oqorsarlugit inigissassatut atorineqassanngippata.

Imm. 2. Inissiap annertussusaa imatut naatsorsorneqassaaq:

- 1) Naqqup ataani inissiap annertussusaa naqqup ataata silammut iigaaniit illup takissusaanut silissusaanullu amerlisitsilluni naatsorsuinikkut uuttorneqassaaq. Naqqup ataa tamakkerluni atorineqanngippat, inissiap annertussusaa illup iluani iikkat ininik immikkoortitsissutaasut qeqqaniit uuttisoqassaaq. Init nateqanngitsut naqqi tamakkerlutik cementimik beton-imiluunniit qallerneqarsimasut uuttortaanerme ilanngunneqassanngillat.
- 2) Inissiap quleriinnerni init quleriinni nalinginnaasumiittut inissiami ataatsimi silami iikkamiit imaluunniit qaliata silataani iikkamiit, tak. nr. 3, aamma inissiap avinnerata qeqqaniit annertussuseq uuttorneqassaaq. Ilaqutariinnut arlalinnut inissiani uuttortaanerme illup isua iikkatut inissianut immikkoortitsissutaasut affartut nalilerneqartarpoq. Qisuit qalliutaasut marluuppata ataatsip uuttorneqarnera qisuup alliup silataaniit uuttisoqassaaq.

3) Qaliani inissiap annertussusaata naatsorsornerani, illup takissusaanut silissusaanullu amerlisitsilluni naatsorsuinikkut uuttuisoqassaaq. Takissuseq inissiap quleriivini nalinginnaasuni uuttuisarnertut uuttorneqassaaq, silissuserlu silami qaliat qalliutaasa qalipaa naqqaniit 1,5 meterinik portussuseqartut akornanni uuttorneqassalluni. Ilassutit, soorlu aniinganerit, iikkat inimut killiliissutaasut silataannit uuttorneqassapput.

Imm. 3. Naqqup ataani qalianilu init imm. 2, nr. 1-imi aamma 3-mi taaneqartut aatsaat najugassatut ilusilersorneqarsimappata, init annertussusaat uuttortaanermut ilanngunneqassapput.

Imm. 4. Init aalajangersimasumik nateqanngitsut uuttortaanermut ilanngunneqassanngillat, taamaattorli tak. imm. 5.

Imm. 5. Imm. 2-4 malillugit inissiap annertussusaata naatsorsuiffiginerani inissiami majuartarfinnut ilanngaateqartitsisoqassanngilaq. Torsuusat, majuartarfiit majuartarfillu sangoriaat ataatsimoorussat, illup silammut iigaasa iluini inini kiassakkani inissisimasut angissusaannut naapertuuttumik uuttortaanermut ilanngunneqassapput, taamaattorli annerpaamik 11 kvadratmeterinik annertussusilerneqassallutik.

Imm. 6. Naalakkersuisut sanaartornermi iluserineqartut tulluarterpassuk imaluunniit pisariaqartippassuk inissiap annertussusaanut imm. 2-5-imut saneqqutsisut naatsorsuiffiginissaannut akuersissuteqarsinnaapput.

§ 36. Inissiap kvadratmeterimut akia inissiap sanaartornerani aningaasartuutit tamarmiusut inissiap initaanit tamarmiusunit agguarneqarnera tunngavigalugu naatsorsorneqassaaq.

Kapitali 6

Taarsigassarsiat inaarlugit akilerneqarneri

§ 37. Taarsigassarsianut inissiat nutaat sanaartornissaannut tunniunneqartunut taarsigassarsisup piffissaq sioqqullugu akiliinerani akiitsunut sinneruttut qinnuteqarfiusumut kingullermik atuisunut akit naleqqersuutaanni qaammatini 12-imi allanngortumi 1 procentpointimik ilallugu kingullermik Naatsorsueqqissaartarfimmi naatsorsuiffiginera atorlugu qinnuteqarnerup aallartiffianut naapertuuttumik kingumut akiligassanngortinneqassapput. Akiitsut sinneri taarsigassarsisup allakkatigut inaarilluni akiliinissaq pillugu noqqaaneraniit aamma taarsigassarsiani piffissamut ernialersuiffiunani akilersuiffiususaanngitsumut sinneruttumut kingumut naatsorsorneqassapput, taamaattorli taarsigassarsiat tunniunneqarneranniit siusinnerpaamik ukiunut tallimanut.

§ 37 a. Namminersorlutik Oqartussanut nunatsinnilu kommuuninut qularnaveeqqusiussaqluni taarsigassarsititsinermit uppersaata aamma akiitsunut uppersaata illuliortiterneq pillugu Inatsisartut inatsisaat manna imaluunniit siusinnerusukkut inatsisaasut naapertorlugit tunniunneqartut kaaviiartitsinermit, qularnaveequtitut imaluunniit akiliisitsisussamit malersorneqarnissamut atorineqarsinnaanngillat.

Kapitali 7

Atulernissaanut, atorunnaarsitinermit ikaarsaarnermullu aalajangersakkat

§ 38. Inatsisartut inatsisaatulloq 1. januar 2018-imi atuutilissaaq.

Imm. 2. Peqatigisaanik illuliortiternermi aningaasalersuineq pillugu Inatsisartut peqqussutaat nr. 1, 7. maj 2007-imeersoq atorunnaarsinneqarpoq.

§ 39. Taarsigassarsiat aamma taarsigassarsinissamut neriorsuinerit, ulloq 1. januar 2018 sioqqullugu tunniunneqarsimasut imaluunniit nalunaarutigineqarsimasut piumasaqaatit allanngortinnagit ingerlatiinnarneqassapput.

Imm. 2. Inatsisartut inatsisaanni matumani § 37-mi pineqarput inissianik nutaanik sanaartornermut taarsigassarsiat aamma taarsigassarsinissamut neriorsuineq 1. januar 2018-ip kingorna tunniunneqartut imaluunniit nalunaarutigineqartut.

§ 40. Qinnuteqartut, ulloq 1. januar 2018 sioqqullugu taarsigassarsinissaq pillugu neriorsorneqarsimasut taarsigassarsiallu tunniunneqarsimanatik, qinnuteqartoqarneratigut inatsisartut inatsisaanni matumani maleruagassat naapertorlugit taarsigassarsinissamut neriorsuummik nutaamik nalunaarfigineqarsinnaapput.

Inatsisartut inatsisaat nr. 36, 29. november 2019-imeersoq (Inissialiortiternermut tapiissutitalimmik illulianik iluarsaassinermut, pitsanngorsaanerimut alliliinermullu taarsigassarsititsisarneq tapiissuteqartarnerlu)^[1] imatut atortuulersitsinerimut aalajangersagaqarpoq:

§ 2

Inatsisartut inatsisaat 1. januar 2020-mi atuutilerpoq.

Inatsisartut inatsisaat nr. 19, 30. november 2020-meersoq (Nutaanik inissialiornissamut taarsigassarsiarititat taamaallaat inunnut taarsigassarsiaritinneqartassapput aammalu inuit inissiamut ataatsimut taamaallaat taarsigassarsinnaallutik)^[2] imatut atortuulersitsinerimut aalajangersagaqarpoq:

§ 2

Inatsisartut inatsisaat ulloq 1. januar 2021 atuutilerpoq.

Imm. 2. Inissialiortiternernut aningaasalersuineq pillugu Inatsisartut inatsisaat imaluunniit inissialiortiternernut aningaasalersuineq pillugu siusinnerusukkut inatsisit naapertorlugu nutaanik inissialiornissamut taarsigassarsiat pioreersut, piginnittut nikinnissaasa tungaanut allannguuteqartinnagit ingerlatiinnarneqarput.

Imm. 3. Ulloq 1. januar 2021 sioqqullugu inissialiortiternernut aningaasalersuineq pillugu Inatsisartut inatsisaat imaluunniit inissialiortiternernut aningaasalersuineq pillugu siusinnerusukkut inatsisit naapertorlugu nutaanik inissialiornissamut taarsigassarsititsinissamik neriorsuutit, pisussaaffiliisumik sanaartornissamut akigititassanut isumaqatigiissuteqartoqarsimanngippat, Inatsisartut inatsisaanni pineqartunut ilaatinneqarput.

Imm. 4. Ulloq 1. januar 2021 sioqqullugu nutaanik inissialiornissamut taarsigassarsititsinissamik neriorsuutit aammalu pisussaaffiliisumik sanaartornissamut akigititassanut isumaqatigiissuteqartoqareersimatillugu, atugassarititaasut allanngortinnagit ingerlatiinnarneqarput. Taarsigassarsisup isumaqatigiissuteqarfigisaanit taassuma isumaqatigiissuteqarfigisaanut piginnittut nikinneranni § 1, nr. 2 aamma 3 atuutissapput.

Inatsisartut inatsisaat nr. 28, 13. juni 2023-meersoq (Radoneqassutsimik annikillisaanissamut taarsigassarsitsineq tapiissuteqarnerlu)^[3] imatut atortuulersitsinermut aalajangersagaqarpoq:

§ 2

Inatsisartut inatsisaat tamanna 2023-mi juulip aallaqqaataani atuutilissaaq.

Inatsisartut inatsisaat nr. 54, 25. november 2024-meersoq (Tulleriiaarinissamut uppersarsaaneq, sanaartortitsinernut naatsorsuutit, kaaviiartitsinissamut inerteqqut, piffissaq sioqqullugu taarsigassarsianik akiliineq il.il.)^[4]

§ 2

Inatsisartut inatsisaat ulloq 1. januar 2025 atuutilissaaq.

Imm. 2. Inatsisartut inatsisaanni Illuliortiternermut aningaasalersuisarneq pillugu Inatsisartut inatsisaat imaluunniit illuliortiternermut aningaasalersuisarnerit pillugit siusinnerusukkut inatsisaasimasut naapertorlugit taarsigassarsiat pioreersut Naalakkersuisunit kommunalbestyrelsimiillu tunniunneqartut ilaapput, taamaattoq imm. 4 takuuk.

Imm. 3. Inatsisartut inatsisaanni Illuliortiternernut aningaasaliisarneq pillugu Inatsisartut inatsisaat imaluunniit illuliortiternernut aningaasalersuisarneq pillugu siusinnerusukkut inatsisaasimasut naapertorlugit ulloq 1. januar 2025 sioqqullugu taarsigassarsinissamut neriorsuinerit Naalakkersuisunit kommunalbestyrelsimiillu nalunaarutigineqartut pioreersut ilaapput.

Imm. 4. Taarsigassarsiat allannguutissatut siunnersuutip atuutilernissaa sioqqullugu siusissukkut akilersinniarnissaat pillugu qinnuteqaat § 37 atuussimasoq tunngavigalugu suliarineqassaaq aalajangiiffigineqarlunilu, taamaattoq ukiut tallimat aatsaat qaangiutereernerisigut.

Ineqarnermut, Attaveqaasersuutitut Isorliunerusunullu Naalakkersuisoqarfik, ulloq april-ip 16.-at, 2025

Ruth Lindhardt (atsior.)

Naalakkersuisoqarfinni pisortaaneq

/ Embla Kristjánsdóttir (atsior.)

- [1] Inatsimmi allannguutit ukuupput § 1, § 2, § 3, § 24 a aamma § 24 b.
- [2] Inatsimmi allannguutit ukuupput § 9, § 9 a aamma § 9 b, § 11, imm. 1., § 27, imm. 2-mi nr. 5-7.
- [3] Inatsimmi allannguutit ukuupput § 19, § 21, § 24 c, § 28, § 30, § 31, § 33 sioqqullugu qulequtaq, § 34 a.
- [4] Inatsimmi allannguutit ukuupput § 1, imm. 2, § 11a, § 12, imm. 1, nr. 5, § 18, imm. 1, nr. 4, § 24, imm. 1, nr. 4, § 27, imm. 1, nr. 6, § 33 a, § 33 a imm. 2, § 33 a imm. 3, § 33 a imm. 4, § 33 a imm. 5, § 35, imm. 5, § 35, imm. 6, § 37, § 37 a.

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut